



PROVISIONAL INSTITUTIONS OF SELF GOVERNMENT

KUVENDI I KOSOVËS
СКУПШТИНА КОСОВА
ASSEMBLY OF KOSOVO

Ligji Nr. 2003/24

LIGJI I SPORTIT

Kuvendi i Kosovës,

Duke u bazuar në Rregulloren nr.2001/9 të dt. 15 majit 2001 Mbi Kornizën Kushtetuese për Vetëqeverisjen e Përkohshme në Kosovë, veçanërisht nenet 5.1 (dh), 5.7, 9.1.26.(a), 9.3.2, 9.3.3.;

Nisur nga të drejtat dhe detyrat e të gjitha institucioneve të edukimit fizik dhe të sportit, që të miratojnë kornizën ligjore për veprimin dhe sjelljen e tyre si dhe të drejtat e qytetarit për të zhvilluar veprimtarinë sportive,

miratoi ligjin vijues:

I. DISPOZITAT E PËRGJITHSHME

Neni 1

1.1. Me këtë Ligj rregullohet organizimi, kushtet dhe mënyrat e zhvillimit të veprimtarive sportive, të drejtat, detyrat dhe përgjegjësitë e bartësve të tyre, si dhe çështjet e tjera me rëndësi për këto veprimtari veçanërisht themelimi, regjistrimi dhe menaxhimi i organizatave sportive .

Neni 2

2.1. Të gjithë personat, pa dallim moshe, gjinie, kombësie, përkatësie politike, racore, fetare, pavarësisht nga mundësitë fizike e mentale, pavarësisht nga niveli shoqëror ose ekonomik i tyre, e gëzojnë të drejtën e marrjes me veprimtari sportive.

Neni 3

3.1. Veprimtari sportive mund të zhvillojnë, organizatat sportive dhe personat e tjerë juridik dhe fizik.

3.2. Personat e tjerë juridikë dhe fizikë, sipas këtij Ligji, janë të gjithë ata persona që janë të regjistruar, si të tillë, për zhvillimin e veprimtarive sportive.

Neni 4

4.1. Aktivitetet politike dhe religjioze janë të ndaluara në organizatat të cilat zhvillojnë veprimtari sportive.

II. PËRKUFIZIMET THEMELORE

Neni 5

5.1. Sipas këtij Ligji, sportive konsiderohet, arsimimi sportiv dhe aktivitetet sportive të orientuara në arritjen e rezultateve në garat sportive, si dhe,

- veprimtaritë për zhvillimin e trupit dhe lojërat e të gjitha grupmoshave;
- ripërtëritja sportive;
- sporti korektues ;
- veprimtaritë e personave profesionalë që përgatisin pjesëmarrës për garat sportive;
- veprimtaritë e personave që marrin pjesë në organizimin dhe udhëheqjen e garave sportive e të shfaqjeve të tjera sportive.

Neni 6

Sipas këtij Ligji:

- 6.1. Veprimtari sportive, konsiderohen veprimtaritë të cilat kanë për qëllim, zhvillimin e aftësive psiko-fizike për arritjen e rezultateve sportive në garat e të gjitha niveleve dhe të të gjitha grupmoshave.
- 6.2. Edukim fizik konsiderohet formimi psiko-fizik i nxënësve, studentëve dhe qytetarëve të tjerë për mirëqenie të shëndoshë të tyre.
- 6.3. Sport amator, konsiderohet veprimtaria sportive mbi parimin e vullnetarizmit.
- 6.4. Sport profesionist, konsiderohet veprimtaria e sportistëve, të cilët zhvillojnë aktivitete sportive në mënyrë profesionale dhe që janë të pajisur me kontratë me klubin përkatës nga i cili edhe financohen.
- 6.5. Organizatë sportive, konsiderohet çdo organizëm që zhvillon veprimtari sportive .
- 6.6. Klub sportiv, konsiderohet organizata sportive, që ka si qëllim të vetin, zhvillimin e veprimtarisë sportive në një njësi administrativo-territoriale të Kosovës.
- 6.7. Federatë e sportit, konsiderohet organizata sportive, si shoqatë qytetare, që ka si qëllim të vetin organizimin, zhvillimin dhe përhapjen e sportit në degë të caktuara, në gjithë territorin e Kosovës.

Neni 7

- 7.1. Veprimtaria sportive, nxitet e drejtohet nga personat fizikë e juridikë, njëkohësisht mbështetet nga organet përgjegjëse për edukimin fizik dhe sportin, nëpërmjet subvencioneve e lehtësive fiskale.
- 7.2. Përkufizimet më të plota, rreth lehtësive fiskale, përcaktohen me akte nënligjore, të nxjerra në përputhje me ligjet përkatëse.

Neni 8

- 8.1. Ministria përkatëse, përcakton politikat e përgjithshme të zhvillimit të sportit, në përputhje me prioritetet e masovizimit dhe të ngritjes së cilësisë së tyre. Ajo krijon kushtet infrastrukturale, financiare dhe kadrovike për përmbushjen e objektivave të caktuara.
- 8.2. Ministria përkatëse autorizon Institutin e Kulturës fizike ose ndonjë subjekt tjetër profesional, që të bëjë përcaktimin e kriterëve për zhvillimin e veprimtarisë sportive dhe zbatimin e politikave të edukimit fizik dhe të sportit.
- 8.3. Me shkeljen e të drejtave dhe detyrimeve që burojnë nga aktet e tyre normative dhe nga ky Ligj, organizatat sportive dhe të gjithë subjektet e tjerë të sportit, përgjigjen para organeve të caktuara kompetente.

III. INTERESI PUBLIK PËR VEPRIMTARINË SPORTIVE DHE MBËSHTETJA INSTITUCIONALE E SAJ

Neni 9

- 9.1. Çdo qytetar i Kosovës gëzon të drejtën e marrjes me veprimtari sportive.

Neni 10

- 10.1. Veprimtaria sportive, paraqet një fushë të rëndësishme të interesit publik e kombëtar, e cila zhvillohet mbi bazë të vullnetarizmit ose të profesionalizmit.

Neni 11

- 11.1. Organet përgjegjëse për edukimin fizik dhe të sportit, janë të detyruara që të angazhohen për të zhvilluar veprimtarinë sportive si fushë të interesit publik e kombëtar.
- 11.2. Interesi publik e kombëtar i veprimtarisë sportive realizohet me sigurimin e të gjitha rrethanave dhe kushteve, e veçanërisht me mjete për programet në shkallë të vendit, me planifikimin, ndërtimin, mbajtjen e objekteve sportive, përcaktimin dhe zbatimin e politikave që nxisin, zhvillojnë dhe përparojnë këtë veprimtari.

Neni 12

12.1. Veprimtaritë sportive, në mënyrë të veçantë përfshijnë veprimtaritë me interes të përgjithshëm dhe lokal në të gjitha degët sportive dhe programet për realizimin e tyre.

Neni 13

13.1. Institucionet publike të të gjitha niveleve, veçanërisht ato, që me këtë Ligj shpallen kompetente, kujdesen për trajtimin, mirëmbajtjen dhe mbështetjen financiare të edukimit fizik dhe të sportit.

Neni 14

14.1. Edukimi fizik dhe sportiv, është i paprekshëm dhe autonom në planifikimin dhe zhvillimin e tij.

Neni 15

15.1. Organizatat sportive dhe të gjithë subjektet e tjerë, të edukimit fizik dhe të sportit, përcaktojnë projektet për zhvillimin e edukimit fizik dhe të sportit për të gjithë, përfshirë këtu gjinitë dhe grupet e ndryshme etnike, nga zhvillimi i aktivitetit masiv e deri te niveli më i lartë.

Neni 16

16.1. Edukimi fizik dhe sporti për të gjithë mbartin vlera të veçanta dhe kombëtare, ku si të tilla, janë në vëmendjen e vazhdueshme të institucioneve publike të të gjitha niveleve, veçanërisht të atyre që shpallen kompetente në përputhje me këtë Ligj dhe për zbatimin e tij.

Neni 17

17.1. Organizatat sportive, mbi bazën e Strategjisë së Zhvillimit të Sportit në Kosovë, ofrojnë kontributin e vetë në kujdesin për shëndetin dhe zhvillimin social të vlerave të sportit, përmes tolerancës, miqësisë, bashkëpunimit, dhe parimeve të tjera të Kartës Olimpike dhe të Kartës Evropiane të Sporteve.

Neni 18

18.1. Organizatat sportive, janë të obliguara të merren me zgjidhjen e problemeve më emergjente të sportit, duke marrë masa adekuate për përballimin e tyre, veçanërisht duke u konsultuar e shfrytëzuar mendimin e kuadrove të specializuara dhe duke zgjeruar hapësirat menaxhuese institucionale të sportit.

Neni 19

19.1. Për kryerjen e punëve me interes publik e kombëtar, për edukimin fizik e të sportit, Ministria përkatëse nxjerrë Programin për Zhvillimin e Edukimit Fizik dhe të Sportit për periudhën katër vjeçare.

19.2. Në Program, në mënyrë të veçantë përcaktohen:

- nevojat e edukimit fizik, të sportit dhe prioritetet e zhvillimit të tyre;
- kualifikimi profesional i kuadrit;
- stimulimi i talentëve të rinjë;
- projektimi dhe sigurimi i investimeve në objektet sportive;
- mjetet e nevojshme për realizimin e interesit publik e kombëtar në edukimin fizik dhe sportiv.

19.3. Në Program, në mënyrë të veçantë, përcaktohen nevojat e edukimit fizik dhe sportiv të personave me aftësi të kufizuara.

IV. QËLLIMET DHE SYNIMET E SPORTIT

Neni 20

20.1. Qëllimet dhe synimet e sportit janë:

- nxitja dhe zhvillimi i sportit masiv për të gjithë;
- ngritja e vazhdueshme e cilësisë së sportit profesionist;
- strukturimi i organizatave sportive, me qëllim të saktësimit të funksionit publik e kombëtar të sportit;
- institucionalizimi i sportit sipas përvojave evropiane dhe më gjerë;
- ndërtimi i infrastrukturës sportive në aspektin social të saj;
- njohja dhe kultivimi i përvojave më të mira bashkëkohore, që synojnë ndërkombëtarizimin e sportit të Kosovës dhe integrimin e tij në sportin evropian e botëror;
- përshtatja e praktikave më të mira menaxhuese bashkëkohore në sport etj.

V. KOMITETI OLIMPIK I KOSOVËS

Neni 21

21.1. Komiteti Olimpik i Kosovës, (KOK) është institucioni më i lartë sportiv kombëtar, themelimi dhe funksionimi i të cilit mbështetet në Kartën Olimpikë dhe në Statutin e saj.

Neni 22

22.1. Komiteti Olimpik i Kosovës, organizohet në pajtim me interesat e zhvillimit të pjesëmarrjes së sportistëve të Kosovës në Lojërat olimpikë.

Neni 23

23.1. KOK organizon, drejton, bashkërendon dhe zhvillon lëvizjen sportive olimpike, në bashkëpunim me organizatat e tjera sportive dhe i bën publike vendimet e veta.

Neni 24

24.1. Kosova ka vetëm një KOK.

24.2. Asnjë organizatë sportive nuk mund ta përdorë dhe keqpërdorë emrin e KOK-ut.

Neni 25

25.1. Në pajtueshmëri me mundësitë buxhetore, Qeveria (Ministria) do të përkrahë aktivitetet e Komitetit Olimpik të Kosovës.

Neni 26

26.1. Në kuadër të KOK-ut funksionon Komisioni i Arbitrimit Sportiv (KAS) në pajtim me aktet përkatëse të KAS-it ndërkombëtar.

VI. FEDERATAT E SPORTIT

Neni 27

27.1. Federatat e sportit, themelohen dhe funksionojnë në përputhje me dispozitat e këtij Ligji, statuteve dhe të rregulloreve të tyre të brendshme, të nxjerra në përputhje me këtë Ligj, si dhe të përshtatur me statutet e federatave ndërkombëtare përkatëse të sportit.

Neni 28

28.1. Federatat e sportit në strukturën e tyre të menaxhimit duhet të përfshijnë të dy gjinitë, të gjitha grupet etnike dhe minoritetet.

Neni 29

29.1. Federata e Sportit, i zhvillon aktivitetet e veta bazuar në politikat dhe në pajtueshmëri me programin e tyre të punës.

29.2. Ministria përkatëse do të mbikëqyrë politikat sportive të Kosovës, të realizuara nga federatat e sportit.

Neni 30

- 30.1. Federatat e sportit, janë të detyruara t'i publikojnë vendimet e tyre.
- 30.2. Federatat e sportit, mund të zhvillojnë procedurë disiplinore ndaj anëtarëve të tyre.
- 30.3. Federatat e sportit, zhvillojnë kontroll për zbatimin e normave të statutit, të akteve të tjera të brendshme dhe të atyre ndërkombëtare, duke u bazuar në parimet e përgjithshme dhe normat konkrete të së drejtës.
- 30.4. Po qe se, vendimet e federatave të sportit janë në kundërshtim të hapur me aktet normative të tyre dhe me këtë Ligj, atëherë organet përfaqësuese dhe personat përgjegjës, dalin para organeve kompetente të drejtësisë, të cilat mund ta anulojnë zbatimin e vendimeve dhe të marrin masa përkatëse ndaj personave udhëheqës.

Neni 31

- 31.1. Miratimi i statuteve të federatave të sportit u shërben si autorizim për të marrë e përdorë emrin me qëllim të funksionimit si federata të sportit.
- 31.2. Kriteret dhe procedurat përkatëse, për marrjen e lejes dhe për funksionimin e federatave të sportit, i përcaktojnë organet profesionale, të autorizuara nga Ministri përkatës.

Neni 32

- 32.1. Për një degë të caktuar sportive, për tërë territorin e Kosovës, themelohet dhe vepron një federatë e vetme e licencuar.
- 32.2. Nxënësit, studentët dhe personat me aftësi të kufizuara, mund të themelojnë federatat e tyre në degë të caktuara sportive.

Neni 33

- 33.1. Federatat e sportit, veprojnë mbi bazën e amatorizmit.
- 33.2. Federatat e sportit, mund t'i paguajnë profesionistët dhe këtë e përcaktojnë në aktet e tyre normative.
- 33.3. Federatat e sportit, mund të marrin ndihmë nga Ministria përkatëse, nga donatorët dhe nga sponzorët.
- 33.4. Federatat e sportit, munden që, brenda rregullave të miratuara në organet e veta, nga fondet e veta, shpërblejnë sportistët cilësorë, për rezultatet e arritura sportive.

VII. KLUBET SPORTIVE

Neni 34

34.1. Klubet sportive themelohen dhe funksionojnë në bazë të këtij Ligji dhe të akteve normative të federatave përkatëse.

Neni 35

35.1. Klubet sportive mund të jenë publike ose private. Klubet publike regjistrohen si organizata joqeveritare, ndërsa klubet private regjistrohen në bazë të ligjeve përkatëse në Kosovë.

Neni 36

36.1. Klubet sportive publike, veprimtarinë e tyre e bazojnë në subvencionet financiare buxhetore ose lokale, si dhe në donacionet nga personat fizikë dhe juridikë.

Neni 37

37.1. Klubet sportive private, themelohen me iniciativa të lira të anëtarëve të tyre dhe, regjistrohen në federatat përkatëse.

37.2. Përkufizimet më të plota do të bëhen me aktet nënligjore, të nxjerra në bazë të ligjeve të veçanta.

VIII. PJESËMARRËSIT NË VEPRIMTARITË SPORTIVE

Neni 38

38.1. Sipas këtij Ligji, pjesëmarrës në veprimtari sportive janë:

- sportistët e të gjitha grupmoshave;
- veprimtarët sportivë;
- pjesëmarrësit e tjerë;
- adhuruesit e sportit, si spektatorë.

Neni 39

39.1. Veprimtaritë sportive, zhvillohen mbi baza amatore dhe profesionale.

39.2. Sportistët të cilët veprimtaritë sportive i zhvillojnë profesionalisht, të gjitha të drejtat dhe detyrat për marrëdhënie pune, i realizojnë në klubin sportiv, si punëdhënës, në mënyrën e përcaktuar me Ligjin e Punës, me marrëveshjen kolektive dhe me kontratën individuale.

Neni 40

- 40.1. Ministria autorizon trupin profesional që t'a bëjë kategorizimin e sportistëve sipas standardeve ndërkombëtare.
- 40.2. Mund të përcaktohen tri kategori sportistësh, të cilat veprimtarinë sportive e zhvillojnë profesionalisht: sportistë të kategorisë botërore; sportistë të kategorisë ndërkombëtare dhe sportistë të kategorisë së vendit.
- 40.3. Verifikimin e dy kategorive të para, në bazë të propozimit të Trupit profesional, e bën Ministria përkatëse, ndërsa verifikimin e kategorisë së sportistëve të kategorisë së vendit, e bëjnë federatat përkatëse të sportit.
- 40.4. Rezultatet sportive, përbëjnë kriterin themelor për kategorizimin e sportit dhe të sportistëve.
- 40.5. Ministria përkatëse merr përsipër përkujdesjen materiale dhe profesionale për sportistët kulminantë.

Neni 41

- 41.1. Sportistëve të cilët veprimtarinë sportive e zhvillojnë mbi baza amatore klubi sportiv obligohet t'u sigurojë kompensim material.
- 41.2. Sportistët amatorë marrin edhe shpërblime të tjera për rezultate të arritura sportive, sipas kushteve të përcaktuara me aktet e klubit sportiv.

Neni 42

- 42.1. Sportisti nuk ka të drejtë të bëjë kontratë me një klub sportiv në të njëjtën kohë kur është i lidhur me kontratë me klubin tjetër sportiv.
- 42.2. Çdo shkelje e kësaj dispozite dënohet sipas sanksioneve të përcaktuara me këtë Ligj.

Neni 43

- 43.1. Mënyra e kalimit të sportistëve profesionistë, dhe e sportistëve amatorë, përcaktohet me rregulloret e federatave të sporteve përkatëse, në përputhje me normat e federatave ndërkombëtare.

Neni 44

- 44.1. Konfliktet lidhur me respektimin e kontratave në mes të klubeve sportive, nëse nuk zgjidhen përmes federatave përkatëse, zgjidhen nga gjykatat kompetente.

IX. MARRËDHËNIET SPORTIVE ME JASHTË

Neni 45

45.1. Në asociacionet sportive ndërkombëtare, mund të anëtarësohet vetëm një federatë sportive nga një sport i caktuar, që vepron në mbarë territorin e Kosovës.

Neni 46

46.1. Klubet sportive, mund të kontaktojnë dhe të lidhin marrëveshje për gara jasht vendit, sipas pëlqimit të federatave të sporteve përkatëse.

Neni 47

47.1. Sportistët e zgjedhur në ekipin përfaqësues, kanë të drejtën e grumbullimit e të trajtimit të veçant për takimet zyrtare ndërkombëtare të të gjitha niveleve.

Neni 48

48.1. Sportistët e ekipit përfaqësues të Kosovës, në çdo sport, paraqiten me embleme dhe me fanelat me kombinim të njëjtë ngjyrash.

48.2. Ekipi përfaqësues ka selektorin e vet të cilin e zgjedhë federata përkatëse.

X. RAPORTI I ORGANEVE PËRGJEGJËSE PËR SPORTIN DHE I ORGANIZATAVE SPORTIVE

Neni 49

49.1. Organizata sportive, mund të zhvillojë veprimtari sportive, po qe se i përmbushë kushtet e përcaktuara me këtë Ligj, të cilat, qysh më parë i publikon Ministria përkatëse dhe organet përgjegjëse të pushtetit lokal.

49.2. Organizata sportive, mund të fillojë ta zhvillojë veprimtarinë sportive, kur organi përgjegjës vërteton se janë përmbushur kushtet për të cilat i lëshon vendimin përkatës.

49.3. Po qe se organizata sportive, zhvillon veprimtarinë sportive, pa marrjen e vendimit përkatës, organi përgjegjës, nisë procedurën para gjykatës kompetente për pushimin e veprimtarisë së saj.

Neni 50

50.1.Ministria përkatëse, në mënyrë të veçant e mbikëqyrë:

- përmbushjen e kushteve për realizimin e detyrave me rëndësi publike dhe kombëtare për sportin;
- shpenzimin e mjeteve publike;
- menaxhimin dhe shfytëzimin e objekteve sportive publike;
- përmbushjen e standardeve dhe parimeve për realizimin e programeve në shkallë të vendit;
- përmbushjen e kushteve për organizimin e garave sportive ndërkombëtare për të cilat jep pëlqimin;
- përmbushjen e standardeve për kontrollimet mjekësore të përkohëshme dhe periodike;
- keqpërdorimin ose shkeljen e të drejtave të sportistëve dhe të klubeve sportive,
- rregullësinë e punës së federatave të sporteve.

50.2.Mbikqyrja, ushtrohet nga komisioni përkatës profesional të cilin e emëron Ministria.

50.3.Organi mbikëqyrës mund t'ia ndalojë organizatës sportive ose individit, zhvillimin e veprimtarisë sportive ose t'i shqiptojë masa të tjera, në përputhje me këtë Ligj.

50.4.Kundër vendimeve të shqyrtuara mund të ushtrohet e drejtë e ankesës në KAS të KOK-ut në afat prej 15 ditësh. Palët e pakënaqura në vendimet e KAS-it mund të ankohen në Komisionin e Arbitrimit Sportiv Ndërkombëtar.

XI. EDUKIMI FIZIK DHE SPORTI NË SHKOLLA DHE NË UNIVERSITET

Neni 51

51.1.Rinia shkollore dhe studentore, e gëzojnë të drejtën, që gjatë shkollimit dhe studimit të mirren me edukim fizik dhe sport në shkollë dhe në universitet.

Neni 52

52.1.Edukimi fizik dhe sporti në shkolla dhe në universitet, kanë për synim,

- zhvillimin e veprimtarive të edukimit fizik dhe të sportit me qëllim të krijimit të kushteve për një gjendje të mirë shëndetësore, fizike dhe të lëvizjeve psiko-motorike të tyre;
- përballimin e pasivitetit dhe apatisë së nxënësve dhe studentëve në planin intelektual, emocional, lëvizor e shoqëror;
- orientimin shkollor dhe universitar të nxënësve dhe studentëve, sipas prirjeve e aftësive të tyre;
- ndalimin e përdorimit të duhanit, alkoolit, drogës dhe ndalimin e rritjes së konflikteve në shoqëri;

- bashkërendimin e bashkëveprimin në veprimtaritë e edukimit fizik dhe të sportit në shkolla e në universitet;
- inkurajimin e dëshirave, prirjeve e talenteve të nxënësve e të studentëve për sporte të caktuara dhe,
- ngritjen e ekipeve të ndryshme të nxënësve dhe studentëve sipas llojeve të sporteve, sipas kushteve dhe mundësive të shkollave e universitetit.

52.2.Ministria përkatëse në bashkëpunim me Ministrinë e Arsimit, Shkencës dhe Teknologjisë kujdeset për zhvillimin dhe edukimin fizik dhe të sportit në shkolla dhe në universitet.

XII. KUADRI PROFESIONAL

Neni 53

53.1.Kuadër profesional konsiderohen personat të cilët kanë të kryerë më së paku shkollimin e lartë sportiv universitar, përkatësisht personat që në formë të specializimit kanë arritur shkallë të duhur kualifikimi profesional.

Neni 54

54.1.Kuadri i huaj profesional, mund të angazhohet në udhëheqjen e treningut sportiv dhe të ndeshjeve sportive në vend, nëse i plotëson kushtet sipas nenit 53 të këtij Ligji.

XIII. OBJEKTET DHE MJEDISET SPORTIVE

Neni 55

55.1.Objektet dhe mjediset sportive mund të jenë:

- publike dhe
- private.

Neni 56

56.1.Përkatësia e objekteve dhe e mjediseve sportive, përcaktohen me vendim të veçant të organit përgjegjës për sportin.

Neni 57

57.1.Objektet dhe mjediset sportive janë private, atëherë kur ndërtohen tërësisht nga personat privatë.

Neni 58

58.1.Objektet dhe mjediset sportive në pronësi publike qeverisen nga organi përgjegjës për sportin.Objektet dhe mjediset e tjera sportive qeverisen nga pronarët ligjorë të tyre.

Neni 59

59.1. Ndalohet ndryshimi i destinimit të objekteve dhe mjediseve sportive.

XIV. MBROJTJA SHËNDETESORE DHE PËRDORIMI I SUBSTANCAVE DHE METODAVE STIMULUESE NË SPORT

Neni 60

60.1. Personat të cilët në klubet sportive aktivisht zhvillojnë veprimtari sportive, janë të detyruar që t'i nënshtrohen kontrollit mjekësor.

60.2. Kontrolli mjekësor përfshinë, vizitën mjekësore përpara fillimit të ndeshjes, ndërsa kontrollin sistematik gjatë kohës së pjesëmarrjes në veprimtari sportive.

60.3. Numrin e kontrollimeve sistematike, e përcakton secila federatë sportive, më së paku një herë në vit.

Neni 61

61.1. Kontrollin shëndetësor të pjesëmarrësve në veprimtari sportive, e kryen mjeku specialist i mjekësisë sportive në ambulancat përkatëse.

Neni 62

62.1. Çdo person, i cili në një klub sportiv, aktivisht zhvillon veprimtarinë sportive, pajiset me kartelë mjekësore.

Neni 63

63.1. Përdorimi i substancave dhe metodave të ndaluara stimuluese, si dhe nxitja për përdorimin e tyre, dënohen sipas normave ndërkombëtare të pranuar nga federatat e sporteve përkatëse, të përfshira në aktet normative të tyre.

Neni 64

64.1. Kosova ka komisionet përkatëse të specializuara të cilat merren me edukimin, propagandën, luftën dhe kontrollin për kundërstimulimin në sportin e Kosovës.

XV. FINANCIMI

Neni 65

- 65.1. Bazën e financimit të sportit dhe të nevojave publike e kombëtare, e përbëjnë mjetet financiare që sigurohen nga buxheti i Kosovës.
- 65.2. Komunitat i formojnë fondet e veta për financimin e sportit.
- 65.3. Programin e nevojave publike e kombëtare në sport, në bazë të propozimit të Ministrisë përkatëse, e miraton Qeveria e Kosovës.
- 65.4. Pjesa tjetër e financimit të sportit realizohet në bazë të të ardhurave që personat juridikë dhe fizikë, të cilët zhvillojnë veprimtari sportive, realizojnë me zhvillimin e kësaj veprimtarie, nëpërmjet kuotave të anëtarësisë, nga lojërat e fatit dhe burimet e tjera që ndihmojnë veprimtarinë e rregullt të organizatave sportive.
- 65.5. Mjetet plotësuese për financimin e sportit, mund të sigurohen nëpërmjet reklamave dhe sponsorizimit.

XVI. REKLAMA DHE SPONSORIZIMI

Neni 66

- 66.1. Shoqëritë tregtare dhe prodhuese kanë të drejtën që të hyjnë në marrëdhënie me organizatat sportive me qëllim reklamimi ose sponsorizimi.

Neni 67

- 67.1. Marrëdhëniet në mes të shoqërive tregtare dhe prodhuese, me organizatat sportive, përcaktohen me kontratë.
- 67.2. Lehtësitë tregtare që mund t'i gëzojnë shoqëritë tregtare dhe prodhuese, që sponsorojnë veprimtaritë e organizatave sportive, përcaktohen me akte nënligjore, të nxjerra në bazë të ligjeve përkatëse.

XVII. E DREJTA RADIOTELEVIZIVE

Neni 68

- 68.1. Personi fizik a juridik, që organizon një veprimtari sportive është pronar i së drejtes së transmetimit në radiotelevizion për të cilin bëhet kontrata.

XVIII. INFORMIMI

Neni 69

- 69.1. Për të siguruar një evidencë të rregullt dhe të saktë për gjendjen në sportin e Kosovës, në Ministrinë përkatëse vepron një shërbim i veçantë për mbledhjen dhe ruajtjen e informatave.
- 69.2. Shërbimi për informata, mban evidencën (regjistrat) e sportistëve, të pjesëmarrësve të tjerë në veprimtaritë sportive, mban evidencën e garave sportive, kombëtare e ndërkombëtare, të objekteve sportive dhe të të dhënave të tjera me interes për sigurimin e dokumentacionit të nevojshëm.

XIX. LUFTIMI I DHUNËS NE SPORT

Neni 70

- 70.1. Çdo shfaqje e dhunës në kuptimin e saj fizik ose moral, si fyerje, dënohet sipas dispozitave disiplinore të federatave sportive, Ligjit për Kundërvajtje, dhe Ligjit Penal të Kosovës.

Neni 71

- 71.1. Ndalohet mbajtja dhe përdorimi i fishekzjarreve dhe armëve të të gjitha llojeve, në objektet dhe mjediset sportive.

Neni 72

- 72.1. Ndalohet tregtimi dhe përdorimi i pijeve alkoolike në objektet dhe mjediset sportive.

Neni 73

- 73.1. Ndalohet duhani në objektet dhe mjediset e mbyllura sportive.
- 73.2. Personat që shkelin këtë dispozitë, largohen nga objektet dhe mjediset e mbyllura sportive.

Neni 74

- 74.1. Personi që merr pjesë në veprimtarinë sportive, në cilësinë zyrtare (gjyqtari, vëzhguesi etj.) është i paprekshëm.
- 74.2. Çdo cenim ose synim për cenim të personit që merr pjesë në veprimtarinë sportive, në cilësinë zyrtare, konsiderohet cenim ose synim për cenim i personit zyrtar dhe, ndiqet në procedurë disiplinore ose penale.

Neni 75

- 75.1. Ruajtja e rendit publik në objektet dhe mjediset sportive, është kompetencë e policisë.
- 75.2. Organizatori i një veprimtarie sportive, është i detyruar, që për këtë veprimtari të njoftojë policinë tri ditë para zhvillimit të veprimtarisë në territorin e të cilit ajo zhvillohet.

XX. DISPOZITAT NDËSHKUESE

Neni 76

- 76.1. Me dënim me gjobë, në shumë prej 1000-5000 €, dënohen organizatat sportive:
- nëse kryejnë veprimtari sportive pa marrjen e pëlqimit nga organi përgjegjës;
 - nëse merren me organizimin politik e fetar;
 - nëse veprimtaritë sportive i kryejnë në objekte sportive të papërshtatshme dhe me kuadër të paspecializuar profesional.
- 76.2. Për shkelje të Ligjit nga alineja e mësipërme, përveç dënimit me gjobë, mund të shqiptohen edhe masa të ndalimit të veprimtarisë sportive për kohë të caktuar, prej 6 muaj deri në 3 vjet.

Neni 77

- 77.1. Me dënim me gjobë, prej 1000-5000 €, dënohet personi profesional i cili detyron sportistin të stërvisë ose të merr pjesë në gara sportive kur nuk është i aftë për shkak të ndonjë lëndimi ose sëmundjeje.
- 77.2. Për shkelje të Ligjit nga alineja e mësipërme, përveç dënimit me gjobë, personit profesional mund t'i shqiptohet edhe masa e ndërprerjes së punës së tij profesionale për kohë të caktuar prej 6 muaj deri në 3 vjet.

Neni 78

- 78.1. Me dënim me gjobë, prej 1000-10.000 €, dënohet personi i cili jep ose merr preparate stimuluese të cilat janë të ndaluara dhe të dëmshme për shëndet.
- 78.2. Për shkelje të Ligjit nga alineja e mësipërme, personit mund t'i shqiptohet edhe masa e ndalimit të profesionit për kohë të caktuar prej 1 deri në 5 vjet.

Neni 79

- 79.1. Me dënim me gjobë prej 1000-2500 euro, dënohet organizatori i garave dhe shfaqjeve sportive, i cili nuk siguron ndihmën e shpejtë medicinale gjatë kohës së mbajtjes së garave ose shfaqjeve sportive.

79.2.Për shkelje nga alineja e mësipërme organizatorit të garave dhe shfaqjeve sportive mund t'i shqiptohet edhe masa e ndalimit të veprimtarisë sportive për kohë të caktuar prej 3 muaj deri në 1 vjet.

Neni 80

80.1.Në rastet e përsëritjes së shkeljeve nga të njëjtit subjekt ose individë,ndeshkimet mund të dyfishohen.

80.2.Kundër vendimeve për dënime me gjobë ose për masën e ndalimit të veprimtarisë sportive për kohë të caktuar,në procedurat përkatëse, mund të ushtrohet e drejta për ankesë.

XXI. DISPOZITAT PËRFUNDIMTARE

Neni 81

81.1.Me miratimin e këtij Ligji, shfuqizohen dispozitat e tjera për sportin në Kosovë.

Neni 82

82.1.Organizatrat sportive dhe subjektet e tjerë, duhet që, në afatin prej gjashtë muajsh të bëjnë harmonizimin e akteve të tyre normative me këtë Ligj.

Neni 83

83.1.Ministria përkatëse, duhet që, në afatin prej 6 muajsh të nxjerrë aktet nënligjore në bazë dhe për zbatimin e këtij Ligji.

Neni 84

84.1.Ky Ligj hyn në fuqi në ditën e shpalljes së tij.

Ligji Nr. 2003/24
20 Nëntor 2003

Kryetari i Kuvendit të Kosovës

akademik Nexhat Daci